



LE GOUVERNEMENT
DU GRAND-DUCHÉ DE LUXEMBOURG
Ministère de la Recherche
et de l'Enseignement supérieur

La Ministre

Äntwert vun der Madamm Minister fir Fuerschung an Héichschoul op d'parlamentaresch Fro n°3167 vum 10. November 2025 vun den honorabelen Deputéierte Françoise Kemp, Maurice Bauer a Ricardo Marques

Am Virfeld ass ze ënnersträichen, datt d'Studentefoire an de leschte Joren a verschiddene Formater stattfonnt huet, bedéngt duerch d'Pandemie an d'kontinuéierlech Weiderentwécklung vum Konzept:

- 2019: Foire en présentiel an der Luxexpo an der Stad (lescht Editioun virum Wiessel vum Site);
- 2020: Wéinst Covid-19 eng komplett digital Editioun, organiséiert als "Semaine de l'Orientation" mat enger Exploratiouns- an enger Interaktiounsphase;
- 2021: Hybrid Form: eng digital Plattform (Exploratiouns- an Interaktiounsphase) kombinéiert mat enger "Journée de Rencontre" en présentiel um Campus Belval mat exklusiv Lëtzebuerger Exposanten (Universitéit Lëtzebuerg, BTSen, Lunex, LSB, Studentenassociatiounen a -Cerclen);
- 2022: Hybrid Form: zwee Deeg Foire en présentiel um Campus Belval, ergänzt duerch eng digital Plattform bis Enn Dezember;
- 2023: Hybrid Form: Foire en présentiel an dräi Gebaier um Campus Belval, plus eng digital Plattform bis Januar;
- 2024: Hybrid Form: eng änlech Konfiguratioun wéi 2023, mat véier Gebaier en présentiel an enger digitaler Plattform bis Januar;
- 2025: Exklusiv en présentiel um Campus Belval, ouni digitalen Deel, mat enger verstärkter Zentraliséierung vun den Exposanten a véier Gebaier.

Dës Evolutioun weist, wéi d'Formater a Modalitéiten all Joer adaptéiert goufen an erklärt, firwat d'Zuele vun de Visiteuren an den Exposanten tëschent de Joren 2020 respektiv 2021 an 2025 net ëmmer direkt vergläichbar sinn.

1. Wéi eng Evaluatioun huet de Ministère bis elo iwwert d'Studentefoire zënter hirem Verleeë vum Standuert op Belval gemaach?

Zënter dem Verleeë vun der Studentefoire op de Campus Belval am Joer 2021 huet de Ministère all Editioun analyséiert an op Basis vum ëmfaassende Feedback vu Schoulen, Schüler, Exposanten an der ACEL kontinuéierlech Verbesserunge virgeholl.

Direkt no de Covid-Joren (2020–2023) goufen all Joer breet Enquêtes de satisfaction realiséiert, déi sech op d'Qualitéit vun der Organisatioun, d'Accessibilitéit, d'Signalétique, d'Auswiel un Exposanten an de Site selwer konzentréiert hunn. Déi Analyse weisen, datt déi grouss Majoritéit vun de Schüler an Exposanten zefridde mam Site a mam Konzept um Belval war. Z. B. waren am Joer 2022 ronn 76 % vun de Schüler an 77 % vun den Exposanten zefridde wat de Site ugeet. Méi mitigéiert war d'Aschätzung vun den Enseignanten an de Verrieder vun de Cellules d'orientation et d'intégration scolaires aus de Lycéeën. (Fir d'Detailer vun deene verschiddenen Enquêtes, verweisen ech op d'Dokumenter, déi ech op Ufro vun der Sensibilité politique vun 'déi gréng' den 19. November der Chamber zoukomme gelooss hunn.)



Zënter 2024, wou de Konzept um Belval etabliert war, ass op eng Online-Enquête verzicht ginn. D'Exposante goufen awer aktiv opgefuerdert, kritesch Bemierkungen a Verbesserungsvirschléi per Mail eranzeginn. Fir 2025 huet dës Approche zu vill positivem internationalen an nationale Feedback gefouert (ë. a. iwwert d'Qualitéit vun der Organisatioun, d'Accessibilitéit an d'Diversitéit vun den Exposanten).

Gläichzäiteg huet de Ministère all Joer konkret Upassungen um Site an am Konzept virgeholl (Signalétique, Informatiounszelter, Choix vun de Gebaier, Rotatioun vun Exposanten, nei Servicer wéi Mobile Guiden, gezielte Social-Media-Campagnen, asw.).

D'Conclusioun vum Ministère war deemno, datt d'Foire um Belval mam viséierte Fokus op akademesch Héichschoulformatiounen sech als héichwäerteg Informatiounsveranstaltung fir dee Beräich etabliert hat.

2. Wéi vill Visiteure goufen an de leschte sechs Editiounen jee gezielt, am Verglach zu de Joren, wou d'Studentefoire nach an der Stad (Luxexpo) ofgehale gouf?

Eng manuell oder maschinell exakt Zielung gouf fir keng vun de Studentefoiren (presentiellen Deel) duerchgefouert. Eng manuell Zielung gouf et nëmmen fir d'Covid-Editioun 2021. Allerdéngs hat dës Zielung net den Objektiv, eng total Zuel u Visiteure festzehalen, mee ze evaluéieren ob déi sanitär zoulässeg Visiteurszuel pro Gebai net iwwerschrott géif.

Fir d'Foiren an der Luxexpo (bis 2019) läit déi geschate Frequentatioun, opgrond vum MESR verdeelte Broschüren an opgrond vun enger maschinner Zielung (Portique), déi allerdéngs multipel Zielunge vu Persounen net ausschléisst, bei ronn 8.000 bis 9.000 Visiteuren. Bis 2019 goufen, nieft de Lëtzebuerger Lycéeën, och Lycéeën aus der Groussregioun ugeschriwwen an op d'Studentefoire invitéiert, esou datt dës en Deel vun de Visiteuren ausmaachen.

D'Zuele vun de Joren 2022-2025 (ca. 6.000 Schüler, ëmmer op de presentiellen Deel vun der Foire bezunn) baséieren op den Zuele vu potenzielle Visiteuren (all Schüler op 1^{re} an 2^e, déi prinzipiell fir en Héichschoulstudium a Fro kommen) a vun de Visite-Creneauen, déi vum Ministère fir Erziung, Kanner a Jugend (MENJE) organiséiert goufen (4 Creneauen × ca. 1.500 Schüler), ergänzt duerch Enseignanten, Elteren an aner Visiteuren.

Et bleift ze ënnersträichen, datt d'Studentefoire sech op eng qualitativ héichwäerteg Informatioun fir déi relevant Zilgrupp (Schüler, Elteren, Enseignanten) konzentréiert. Dës Approche ass am Aklang mat der ursprénglecher Vociatioun vun der Foire.

3. Kann de Ministère eng Oplëschtung vun der Unzuel un Aussteller aus deenen sechs Editiounen virleeën?



Hei eng d'Oplëschting vun der Unzuel un Aussteller aus de leschte sechs Editiounen:

Editioun	2020	2021	2022	2023	2024	2025
Virtuell Stänn	194	217	176	206	193	-
Physesch Stänn	-	48	94	118	118	166

4. Huet de Ministère Enquêtes oder Feedbacks vun de Participanten (Schüler, Elteren, Schoulen an Aussteller) analyséiert, a wa jo, wat si d'Haaptconclusiounen?

Wéi a menger Äntwert op déi éischt Fro scho preziséiert, gouf fir d'Editiounen 2020, 2021, 2022 an 2023 all Kéiers eng breet Enquête de satisfaction duerchgefouert, ausgewäert an duerno konkret Adaptatiounen fir d'Editioun vum Joer drop ëmgesat. Zënter 2024 gouf op dës Online-Enquête verzicht, well de Konzept um Belval stabil etabliert war. 2024 a 2025 goufe sämtlech Exposanten awer systematesch opgefuerdert, Feedback via E-Mail eranzeginn.

Aus den Enquêtes an deem genannte Feedback ass ervirgaangen, dass den allgemengen Objektiv vun enger héichwäerteger Informatiounsveranstaltung iwwer akademesch Héichschoulstudie mat der Foire um Belval erreicht gouf.

5. Gëtt et Iwwerleeungen, d'Organisatioun oder d'Lokalisatioun vun der Studentefoire nach eemol z'iwwerpräiwen, fir hir Attraktivitéit ze iwwerdenken?

Ech sinn oppen fir e konstruktiven Dialog a fir nei Iddien, am Austausch besonnesch mat der ACEL an allen aneren Acteuren, déi eng Roll an der Schülerorientéierung an -Informatioun spillen.

An deem Sënn hunn ech mech an engem Gespréich, de 25. November 2025, mat de Responsable vun der ACEL ausgetosch iwwert eng méi holistesche Approche vun der Foire, domadder verbonnen iwwert eng Offer, déi sech och méi spezifesch géif u Jonker wenden, déi keen Héichschoulstudium viséieren, an deemno iwwert eng méi grouss Diversitéit vun Exposanten (mat ë.a. méi Exposanten aus der Beruffswelt an aus dem Beräich vun der non-formaler an informeller Bildung), genau wéi iwwert eng méiglech méi enk Koordinatioun mam MENJE an, le cas échéant, mam Aarbechtsministère an de Servicer vun der ADEM.

Den Héichschoulministère zesumme mat de Vertrieder vun der ACEL wäerten en entsprecheend Konzept ausschaffen. Fir esou en neit Konzept wäert de Site Belval d'Ufuerderungen net méi kënnen erfëllen, opgrond vun enger méi grousser Unzuel un Exposanten, a mir wäerte mat der ACEL zesummen e Site fannen, deem der neier Ausrichtung vun der Studentefoire ka gerecht ginn.



LE GOUVERNEMENT
DU GRAND-DUCHÉ DE LUXEMBOURG
Ministère de la Recherche
et de l'Enseignement supérieur

La Ministre

Lëtzebuerg, de 5. Dezember 2025

D'Ministesch fir Fuerschung an Héichschoul
(s.) Stéphanie OBERTIN